



BERKONGSI BINATANG KORBAN WALAUPUN NIAT BERBEZA

(Bilangan 272)

بِسْمِ اللَّهِ ، وَالْحَمْدُ لِلَّهِ ، وَالصَّلَاةُ وَالسَّلَامُ عَلَى رَسُولِ اللَّهِ ، وَعَلَى آلِهِ وَصَحْبِهِ وَمَنْ وَالَاه
(*Dengan nama Allah, Segala puji bagi Allah, Selawat dan salam ke atas
Rasulullah Shallallahu 'alaihi wasallam, keluarga, sahabat dan para pengikut Baginda*)

Ibadah korban merupakan suatu ibadah sunat yang sangat dituntut dalam Islam. Selain merupakan syi'ar serta peringatan kepada pengorbanan Nabi Ibrahim 'Alaihissalam, iaitu dengan menyembelih puteranya Nabi Ismail 'Alaihissalam, terdapat juga pelbagai fadhilat serta ganjaran yang bakal diperolehi apabila melaksanakan ibadah ini.

Jika Hari Raya 'Aidil Fitri merupakan hari kegembiraan bagi fakir miskin kerana menerima zakat, maka Hari Raya 'Aidil Adhha juga membawa kegembiraan serupa kerana memperolehi daging korban.

Di negara kita Hari Raya 'Aidil Adhha juga dikenali sebagai Raya Korban atau Raya Haji. Alhamdulillah kesedaran tentang kemuliaan dan keutamaan Hari Raya 'Aidil Adhha sudah semakin ketara. Di samping sambutan yang meriah, umat Islam di negara ini menyambutnya dengan melaksanakan ibadah korban.

Seringkali juga kita mendengar ahli keluarga berbincang sesama mereka untuk berkongsi binatang korban. Selain dengan niat untuk melakukan ibadah, bagi mereka ini, berkorban juga merupakan sebagai acara tahunan untuk berkumpul beramai-ramai pada hari tersebut serta mengeratkan lagi silaturrahim dan memupuk sikap bergotong-royong. Apatah lagi penyembelihan binatang korban memerlukan tenaga yang ramai.

Kadangkala terjadi juga di mana dalam suatu keluarga itu mendapat kelahiran anak damit dan tidak berkesempatan melakukan aqiqah kerana kesempitan masa dan wang, maka tidak ketinggalan ingin turut sama melaksanakan aqiqah ketika hari raya korban.

Malahan pada peringkat kampung atau jabatan, kadangkala persediaan untuk majlis korban sudah dibuat lebih awal lagi. Perancangan dibuat dari awal tahun dari segi mengatur acara majlis, menentukan hari, tarikh dan tempat berkorban, bahkan menubuhkan tabung kewangan bagi mereka yang bercadang untuk berkorban dan seumpamanya.

Perkara seumpama ini adalah bertepatan dengan kehendak syarak sebagaimana yang telah disebutkan dalam firman Allah *Subhanahu wa Ta'ala*:

وَتَعَاوَنُوا عَلَى الْبِرِّ وَالتَّقْوَىٰ وَلَا تَعَاوَنُوا عَلَى الْإِثْمِ وَالْعُدْوَانِ

(سورة المائدة: ٢)

Tafsirnya: “Hendaklah kamu bertolong-tolongan untuk membuat kebajikan dan bertakwa dan janganlah kamu bertolong-tolongan pada melakukan dosa (maksiat) dan pencerobohan.”

(Surah al-Ma'idah: 2)

Sepertimana yang lazim dilakukan, oleh kerana keadaan atau sebab-sebab tertentu, maka seseorang itu pada kebiasaannya akan berkongsi seekor lembu itu dengan individu lain. Apa yang seringkali terjadi ialah mereka yang ingin berkorban akan mencari individu lain yang juga mempunyai niat yang sama, dengan tanggapan bahawa perkongsian yang dilakukan dengan niat yang berbeza-beza di antara mereka adalah diragukan tidak dibenarkan oleh syarak. Apakah tanggapan ini benar?

Persoalannya apakah boleh dia berkongsi seekor lembu itu dengan yang lain, bahkan dengan niat yang berbeza-beza? Misalnya sebahagiannya berniat untuk berkorban dan sebahagiannya lagi berniat untuk aqiqah. Maka untuk menjawab persoalan ini, berikut akan dibawakan penerangannya secara ringkas.

Had Perkongsian Binatang Korban

Adapun binatang yang boleh dijadikan korban adalah unta dan lembu atau seumpamanya seperti sapi dan kerbau, dan kambing atau seumpamanya. Memandangkan di negara kita binatang yang sering dijadikan korban adalah kambing, lembu (sapi) atau kerbau, maka perbincangan akan lebih menjurus kepada binatang yang telah disebutkan ini.

Maka had perkongsian binatang korban ini adalah berbeza sepertimana penjelasannya di bawah ini:

1. Kambing Dan Seumpamanya

Seekor kambing samada tujuan menyembelihnya adalah untuk korban ataupun aqiqah, maka seekor kambing itu tidak boleh dibahagi atau dikongsi melainkan cuma satu bahagian sahaja.

Walau bagaimanapun harus berkongsi dengan orang lain dalam pahala berkorban dengan seekor binatang korban itu, kerana Rasulullah *Shallallahu ‘alaihi wasallam* telah menyembelih dua ekor kibasy dan Baginda berdoa:

اللَّهُمَّ تَقَبَّلْ مِنِّي مِنْ مُحَمَّدٍ وَآلِ مُحَمَّدٍ

Maksudnya: “Ya Allah! Mohon terima (korban) daripada Muhammad dan daripada keluarga Muhammad.”

Maka dapat difahami bahawa seekor kambing itu hanya sah dibuat korban atau aqiqah untuk seorang sahaja, tidak boleh lebih daripada itu.

2. Unta Dan Lembu Dan Seumpamanya

Seperti yang telah disebutkan dalam kitab Fiqah bahawa seekor unta, lembu (sapi) atau kerbau itu boleh dikongsikan oleh tujuh orang atau dibahagi kepada tujuh bahagian. Ini berdasarkan hadis daripada Jabir *Radhiallahu ‘anhu* katanya:

نَحَرْنَا مَعَ رَسُولِ اللَّهِ صَلَّى اللَّهُ عَلَيْهِ وَسَلَّمَ بِالْحُدَيْيَةِ الْبَدَنَةَ عَنْ سَبْعَةٍ
وَالْبَقْرَةَ عَنْ سَبْعَةٍ

(رواه الترمذي)

Maksudnya: “Kami telah menyembelih bersama Rasulullah Shallallahu ‘alaihi wasallam di Hudaibiyah seekor unta bagi tujuh orang dan seekor lembu bagi tujuh orang.”

(Hadits riwayat at-Tirmidzi)

Perkongsian Binatang Korban Dengan Niat Yang Berbeza

Menurut Imam An-Nawawi *Rahimahullah* bahawa perkongsian pada binatang korban yang dibenarkan, iaitu unta, lembu (sapi) dan kerbau, dengan niat yang berbeza-beza adalah dibolehkan. Beliau menyatakan dalam Kitab al-Majmu’:

وتجزىء البدنة عن سبعة، وكذا البقرة، سواء كانوا أهل بيت أو بيوت، وسواء

كانوا متقربين بقربة متفقة، أو مختلفة، واجبة أو مستحبة، أم كان بعضهم يريد

اللحم. ويجوز أن يقصد بعضهم التضحية، وبعضهم الهدي.

Ertinya: “Boleh seekor unta, demikian juga lembu untuk tujuh orang, sama ada untuk sebuah ahli keluarga ataupun untuk beberapa ahli keluarga. Sama ada mereka itu melakukan korban dengan maksud yang sama ataupun berbeza, sama ada korban wajib atau sunat, atau sebahagian mereka hanya mahukan daging. Harus juga kalau sebahagian mereka bermaksud melakukan korban dan sebahagiannya lagi bermaksud al-hadyu (binatang yang disembelih di tanah haram sebagai dam haji atau umrah).”

Secara ringkasnya dihuraikan kata-kata Imam an-Nawawi *Rahimahullah* bahawa harus (dibolehkan) berkongsi unta, lembu (sapi) dan kerbau, iaitu:

- 1) Jumlah perkongsian paling maksima ialah **tujuh bahagian**, tidak lebih daripada itu. Adapun jika kurang daripada itu, umpamanya enam bahagian, maka itu juga dibolehkan. Maka termasuklah juga makna tujuh bahagian itu perkongsian antara **tujuh orang** di mana setiap seorang mengambil atau menerima satu per tujuh (1/7) bahagian unta, lembu (sapi) atau kerbau.
- 2) Samada dikongsikan tujuh bahagian itu dengan ahli keluarga sendiri ataupun orang lain. Ini berdasarkan hadis daripada Jabir *Radhiallahu ‘anhu* dia berkata:

خَرَجْنَا مَعَ رَسُولِ اللَّهِ صَلَّى اللَّهُ عَلَيْهِ وَسَلَّمَ مُهْلِينَ بِالْحَجِّ فَأَمَرَنَا
رَسُولُ اللَّهِ صَلَّى اللَّهُ عَلَيْهِ وَسَلَّمَ أَنْ نَشْتَرِكَ فِي الْإِبِلِ وَالْبَقَرِ كُلِّ
سَبْعَةٍ مِّنَّا فِي بَدَنَةِ

(رواه مسلم)

Maksudnya: *“Kami keluar bersama Rasulullah Shallallahu ‘alaihi wasallam (dari Madinah) berniat untuk mengerjakan haji maka Baginda Shallallahu ‘alaihi wasallam menyuruh kami berkongsi pada unta dan lembu, setiap tujuh orang dari kami bagi seekor unta.”*

(Hadits riwayat Muslim)

Dapat difahami daripada hadis di atas secara zahirnya mereka yang diperintahkan berkongsi pada unta dan lembu itu bukanlah berasal daripada satu keluarga yang sama.

- 3) Samada niat kesemua mereka yang berkongsi itu adalah:
 - a) **Niat yang sama**, seperti berkongsi lembu dengan niat untuk korban sahaja atau aqiqah sahaja.
Sepertimana yang telah diketahui bahawa dalam perkara aqiqah disunatkan untuk menyembelih dua ekor kambing bagi anak lelaki dan seekor kambing bagi anak perempuan. Maka seekor kambing itu menyamai satu per tujuh ($1/7$), iaitu satu bahagian daripada unta atau lembu. Oleh itu jika seekor unta atau lembu itu disembelih sebagai aqiqah bagi tujuh (7) orang anak atau jemaah seramai tujuh orang, maka itu adalah harus (dibolehkan).
 - b) **Niat yang berbeza-beza**, seperti:

- Sebahagian berniat korban, sebahagian yang lain berniat aqiqah dan sebahagian yang lain pula berkongsi hanya semata-mata kerana untuk mendapatkan dagingnya sahaja. Maka bagi setiap seorang daripada mereka sepertimana yang diniatkannya.

Begitu juga dalam perkara aqiqah, di mana sebahagiannya berkongsi dengan tujuan aqiqah dan sebahagian yang lain hanya semata-mata kerana untuk mendapatkan daging sahaja, maka hukumnya juga adalah harus (dibolehkan).

- Sebahagiannya berniat korban atau aqiqah wajib (kerana nazar), sementara sebahagian yang lain lagi berniat korban atau aqiqah sunat.
- Sebahagian mereka bermaksud melakukan korban dan sebahagiannya lagi bermaksud *al-hadyu* (binatang yang disembelih di tanah haram sebagai dam haji atau umrah).

Maka dengan penjelasan ini dapat dibuat kesimpulan bahawa hukum melakukan korban adalah sunat yang sangat dituntut bahkan adalah lebih afdhal daripada bersedekah. Bahkan menurut Imam asy-Syafi'e *Rahimahullah* bahawa beliau tidak memberi *rukhsah* (kelonggaran), bahkan makruh, untuk meninggalkan ibadah korban bagi mereka yang berkemampuan untuk melaksanakan korban.

Perkongsian binatang korban seringkali tidak dapat dielakkan misalnya disebabkan ketiadaan kambing maka seseorang itu berkongsi dengan yang lainnya pada seekor lembu atau perkongsian yang dilakukan untuk mencukupkan tujuh bahagian tersebut.

Maka seekor kambing itu hanya memadai untuk satu bahagian. Seekor kambing itu menyamai satu per tujuh (1/7), iaitu satu bahagian daripada unta atau lembu. Jumlah maksima perkongsian pada seekor unta, kerbau dan lembu itu adalah tujuh bahagian, adapun kurang daripada itu tidak mengapa.

Perbezaan niat tidak menjadi halangan kepada mereka yang ingin melakukan ibadah korban. Sekalipun mereka yang berkongsi binatang korban itu dengan niat yang berbeza, hukumnya adalah dibolehkan (harus).